



UNIVERSITÄTS-
BIBLIOTHEK
PADERBORN

Universitätsbibliothek Paderborn

Conciliorvm Omnivm Generalivm Et Provincialivm Collectio Regia

Ab anno DLXXVII. ad annum DXC.

Parisiis, 1644

Epistola XXXIII. Gregorii Papae I. Ad Castorivm Notarivm. De vsu pallii secundum morem antiquum Andreae Rauennati episcopo restituendo.

urn:nbn:de:hbz:466:1-15221

EPISTOLA XXXIII.

GREGORII PAPÆ I.

AD CASTORIVM NOTARIVM.

De vsu pallii secundum morem antiquum Andreæ
Rauennati episcopo restituendo.

Gregorius Castorio notario.

VIR magnificus domnus Andreas crebro mihi imminet de vsu pallii secundum antiquam consuetudinem in Rauennati ecclesia restituendo. Et scis quia Ioannes episcopus mihi scripserit, quod in litaniis solennibus consuetudo fuit eiusdem ecclesiæ episcopos uti pallio. Huius ecclesiæ diaconus Adeodatus, cum me pro eadem causa fortiter rogaret, iureiurando satisfecit, quia quater in anno uti in litaniis pallio eiusdem loci episcopi solebant. Prædictus autem domnus Andreas in epistolis suis dicit, quia præterquam in quadagesima omni tempore Rauennas episcopus in litaniis pallio utebatur: & ipsas asserit litanias solennes, quas non erubescit dicere quotidianas. Vnde omnino miratus sum. Sed tua experientia nullius personam, nullius verba consideret, solum Dei timorem, & reuerentiam ante oculos habeat, & seniores personas, & eiusdem ecclesiæ archidiaconum, quem non suspicor pro alterius honore periurare, & alios antiquiores, qui in sacris ordinibus ante Ioannis episcopi tempora fuerant, requirat; vel si qui maturiores sunt extra sacros ordines, & veniant ante corpus sancti Apollinaris, & tacto eius sepulcro iurent, quæ consuetudo ante Ioannis episcopi tempora fuerat: quia sicut scis, idem vir multum præsumptor extitit, & multa sibi per superbiam conabatur arrogare. Et quidam a fidelioribus viris & grauibus iuratum fuerit, secundum indiculum, qui subter annexus est, hoc volumus in eadem ecclesia conseruari. Sed vide ne negligenter agas, ne quis fidem tuam aut deuotionem tuam in hac causa corrumpat; zelum enim tuum scio. Age solicite, ita tamen ut prædicta ecclesia contra iustitiam non grauetur, sed vsus qui ante Ioannis episcopi tempora extitit ei conseruetur. Personas autem non duas vel tres ad satisfaciendum tibi, sed quantas antiquiores & grauiore inueneris, require, ut

Ioan. diac.
lib. 4. c. 6.

neque quod vsus fuit antiquior eidem ecclesiæ denegemus, neque quod nouo ausu appetitum est concedamus. Sed omnia age blande & dulciter, vt & actio tua districta fit, & lingua mitis. Spatam quæ illic dimissa est, sicut iam pridem scripsimus, tecum reuoca, & hoc quod tibi filius noster Bonifacius diaconus, & vir magnificus Maurentius chartularius scripsit, solícite attende.

Formula iuramenti.

Iuro * ergo per Patrem, & Filium, & Spiritum sanctum, inseparabilem diuinæ potentia Trinitatem, & hoc corpus beati Apollinaris martyris, me pro nullius fauore personæ, neque commodo aliquo interueniente testari: sed hoc scio, & per memetipsum cognoui, quia ante tempora Ioannis quondam episcopi, Rauennas episcopus præsentem apocrisario sedis apostolicæ illo atque illo, illis atque illis diebus consuetudinem vtendi pallio habuit; & non cognoui quia hoc latenter, vel absente apocrisario vsurpasset.

EPISTOLA XXXIV.

GREGORII PAPÆ I.

AD ANTHEMIVM SVBDIACONVM.

De redemptione captiuorum qui in Campania tenti sunt.

Gregorius Anthemio subdiacono.

QUANTVS dolor, quantaque sit nostro cordi afflictio de his quæ in partibus Campaniæ contigerunt, dicere non possumus, sed ex calamitatis magnitudine potes ipse cognoscere. Ea de re pro remedio captiuorum qui tenti sunt, solidos experientiæ tuæ per harum portitorem Stephanum virum magnificum transmisimus, admonentes vt omnino debeas esse solícitus, ac strenue peragas, & liberos homines, quos ad redemptionem suam sufficere non posse cognoscis, tu eos festines redimere. Qui vero serui fuerint, & dominos eorum ita pauperes esse compereris, vt eos redimere non assurgant, & hos quoque comparare non definas. Pariter etiam & seruos ecclesiæ, qui tua negligentia perierunt, curabis redimere. Quoscumque autem redemeris, subtiliter notitiam, quæ nomina eorum, vel quis, vbi maneat, siue quid agat, seu vnde sit contineat, facere modis